

(* kleines, längliches Loch beeinträchtigt zwei Zeilen der Urkunde, ein Zustand der bereits bei der Abschrift des 16. Jahrhunderts durch eine Lücke markiert wurde: *Diess....bei* [GLA 229/11107]).

16) 1463 Mai 13 (GLA 44/9088)

Wir Ruprecht, Von gotts gnaden Bischoff zu Strasburg vnd Lanntgraue Zu Elsas Bekennen vnd dun kunt offenbare mit dießem brieffe, das wir vnserm Lieben getruwen Thoman Snewelin bernlopp von Bolßwilr sollichs hernachgeschriben, so dann Hans Snewelin Bernlopp gnant der grescher von vnserm furfarn vnd Stifft Strasburg Zu lehen gehabt vnd von sins abgangs wegen nach erbeschafft wise an den guten Thoman vnd sin lehens erben, als wir vnderriht werden, gefallen ist.

– Zum Ersten den Burgstadel zu Birgkenberg Jm Brißgauwe gelegen, mit siner zugehorde, nemlich das weldel gnant Waltenberg,

– Item deßglich diess hienachgeschriben acker vnd matten:

zum ersten drittelhup Juchart acker am eichacker,

Item ein Juchart Jn der binnen zu Jnickhofen,

Item drij Juchart am Rube acker,

Item drittelhup Juchart am einsiedeler,

Item zwo Juchart matten vnden an dem widenmatten,

Item vnd ein zweiteil Jn der griesmatten

Zu Rechtem mannelehen gelihen haben, Lihen Jme vnd sinen lehens erben auch sollichs Jnn vnd mit crafft diß brieffs, das zu haben, zu nutzen vnd zu geniessen nach lehens reht vnd Inn aller masse der genant Hans Snewelin vnd sin voraltern das geuößen habent ane alle geuerde.

Vnd der vorgenant Thoman ist auch uff ein sollichs vnser vnd vnser Stifft manne worden vnd hat vns mit guten truwen globt vnd einen eidt mit uffgehabener Hant vnd gelerten worten liplich zu got vnd den Heligen geschworn, vns vnd vnser stifft Strasburg getruwe vnd holt zu sin, vnsern schaden zu warnen vnd zu wenden, vnsern fromen vnd bestes zu werben vnd zu furdern vnd alle zijt getruwelich ze dun, was ein getruwe manne sinem Herren von solicher lehen empfangniß wegen durch gewonheit oder durch recht pflichtig ist vnd billich Sin solle, als auch nach Jme sin lehens erben dun sollen.

Vnd Jn dißer vnserer lihung ... haben wir außgenommen vnser vnd vnser stift reht, vnser mannen vnd eins iglichen recht aller ... ge Vngeuarlich.

Des zu vrkunde haben wir vnser Jngesigel an disen brieffe dun hencken, Der geben ist zu zabern vff freitag vor dem ... heligen Nonetage Jn dem Jare noch Christus gepurt Dusent vierhundert Sechtzig vnd driß Jare.

17) 1472 Mai 2 (GLA 44/9097)

Ich, Hanns Snewli von Bolswyler, Bekenn offentlich mit dem brieffe, daz der durchleuchtig Hochgeborn Fürst vnd Herre, hertzog Sigmund, hertzog ze Österreich vnd Graff Ze Tyrol ec. mein genedig Herre mir als dem Elttisten an statt vnd als Lehentrager Jörgen, Fridrichs, Gabryeln, meiner brüeder, die Hernach geschriben Stuck vnd Gütter, So von Weylend Thoman von Bolswyler, vnserem vatter Erblich an Vns geuallen vnd von dem bemelten vnserm gnedigen Herren, auch dem loblichen Hauss